



**PRIMEIRO
MINISTRO**

**DISCURSO
SUA EXCELÊNCIA PRIMEIRO-MINISTRO
KAY RALA XANANA GUSMÃO NIAN**

**IHA OCASIÃO
CIMEIRA BA FUTURO**

“SOLUÇÕES MULTILATERAIS BA FUTURO NEBÉ DI’AK LIU”

Assembleia Geral das Nações Unidas, Nova Iorque
22 de setembro de 2024



Palácio do Governo
Avenida Marginal
Dili, Timor-Leste

Excelências
Senhoras e Senhores,

Ho laran haksolok boot mak ha'u participa iha Cimeira kona-ba Futuro né.

Timor-Leste celebra, iha fulan liubá, 25.º aniversário Consulta Popular, nebé realiza ho tulun husi Organização das Nações Unidas, nebé ami-nia povo vota ho aten-barani ba autodeterminação no liberdade.

Independência Timor-Leste nian né hanesan conquista ida husi povo timor tomak, no mós triunfo ida husi sistema internacional.

Hatudu katak, ho compromisso, cooperação internacional bele atingi objetivos nebé ita hotu hakarak no hasoru desafios ho oportunidades tuir nia tempo.

No sekarik ohin-loron Timor-Leste hanesan democracia estável, pacífica ida nebé iha transição ba desenvolvimento, né la-ós de'it tanba hetan nafatin apoio husi Comunidade Internacional, maibé mós ba esforços nacionais hanesan reconciliação ho diálogo ba paz, hodi garante futuro pacífico.

Ami hatene katak laiha paz mak sei laiha condições ba desenvolvimento. Tanba né, mak investe iha educação ba ami-nia jovens, hanesan investimento di'ak liu ba desenvolvimento sustentável no ba paz.

Excelências,

Paz hanesan conceito abstrato ida ba nações barak iha mundo.

Saara Ocidental hein hela atu halo nia referendo desde 1992. Hein tinan 32 ona! Direito internacional seidauk to'o iha última colónia África nian né, nebé ema lakohi hatene no haluha.

Comunidade Internacional seidauk hetan soluções multilaterais ba futuro ho paz ba nações barak iha mundo - husi Palestina to'o Ucrânia, husi Iémen to'o Sudão, husi República Centro-Africana to'o República Democrática do Congo, husi Afeganistão to'o Myanmar, no husi Haiti to'o países frágeis barak iha conflito laran.

Ita hotu hatene katak Nações Unidas né harí depois de Segunda Guerra Mundial ba preservação paz mundial, ba direitos humanos no ba desenvolvimento internacional.

Maibé, ita moris iha desordem, incerteza, instabilidade no conflito laran. Ita hasoru desafios nebé complexos liután, inclui crise climática, desigualdade extrema ho tensões geopolíticas nebé aumenta barak tan.

Países Menos Desenvolvidos (PMD) ho Pequenos Estados Insulares em Desenvolvimento (PEID) hein hela, ho paciência, soluções nebé flexíveis liu, inclusivas liu no responsivas liu.

Meios ho financiamento atu alcança ODS uitoan tebes. Uitoan atuhodi combate pobreza extrema (ka moris-kiak rabat-rai), insegurança alimentar, crises humanitárias ho alterações climáticas, lakon biodiversidade ho degradação ambiental nebé ameaça existência Estados-ilhas balu, liuliu iha Pacífico.

Sira nebé contribui menos liu ba crises globais, mak terus uluk liu, terus barak liu, dala barak, isolados (ka mesa-mesak de'it).

Sira sai vítimas husi atores no políticas internacionais irresponsáveis nebé valoriza liu lucro ho poder do que dignidade humana.

Enquanto crises hirak-né sai maka'as, ema barak liután mak terus tanba hamlaha. Dados husi Índice Global kona-ba Hamlaha halo ita hakfodak tebes. Hela de'it tan tinan 6 atu cumpri ODS!

Mundo saída mak ita ohin-loron moris ba né, nebé ita bele alimenta funu, maibé labele alimenta labarik sira?

Ita assiste ona ema rihun-ba-rihun nebé mate iha Mediterrâneo, husik hela sira-nia rain tanba halai husi conflitos no pobreza. Ita hein katak ho "Pacto ba Futuro" né, Comunidade Internacional, hanesan líderes mundiais sira, bele haré ba problema né ho sensibilidade boot liu do que comenta de'it questões kona-ba imigração.

Excelências,

Ha'u defende reforma estrutural ida iha Conselho de Segurança, nebé sai tiha ona buat obsoleto (ka fora do tempo), ineficaz no ladún representativo husi realidade.

Organização internacional só bele credível se bele responde ba necessidades atuais no la taka an iha mecanismo ida nebé cria atu hodi hasoru problemas tinan 80 nian ba kotuk.

Ha'u defende alargamento membros permanentes Conselho de Segurança, atu bele iha representatividade no legitimidade boot liu — geográfica, cultural no económica.

Difícil atu concretiza princípios hanesan transparência, responsabilidade no confiança, enquanto países ricos no desenvolvidos sira continua decide lori países pobres no desenvolvimento sira-nia naran. Parte lubun oan ida mak decidi kona-ba ami,no la ho ami!

Ha'u defende investimento boot liu iha diplomacia preventiva nebé bele identifica causas husi problemas no reforça processos nacionais, ho esforço diplomático nebé boot liu hodi rona no compreende, em vez de impõe soluções teóricas descontextualizadas.

Cessar-fogo ida tuir ho negociações, mesmo que ba período naruk, sempre di'ak liu do que fornecimento kilat hodi halakon inimigo - tanba, iha mínimo, bele hamenos labarik ho feto sira nebé sai vítimas husi conflito.

Ha'u defende mós luta hasoru estruturas económicas oportunistas no la hanesan, no mós apoio financeiro boot liu ho redução tusan husi países em desenvolvimento. Comunidade internacional tenke financia esforços desenvolvimento global nian.

Urgente pacto ida ba futuro — pacto reforma nebé bele hateke ba futuro ho base iha desafios globais ohin-loron nian, no nebé bele renova ema hotu nia confiança, liuliu, husi geração foun nebé sira mak sei concretiza pacto né.

Afinal, ita moris hamutuk iha planeta ida, ita hotu hanesan cidadãos mundo né nian, ita interdependentes no partilha futuro nebé ita hili ohin-né.

Muito obrigado.

Kay Rala Xanana Gusmão